

四庫全書

集部

欽定四庫全書

集部

午溪集卷一至五

詳校官編修臣程槐

中書_臣劉源溥覆勘

覆校官中書_臣方大川

分校官中書_臣牛稔文

謄錄監生_臣蔣瀚

欽定四庫全書

集部五

午溪集目錄

別集類四元

卷一

五言古詩

卷二

五言古詩

卷三

五言律詩

卷四

五言律詩

五言絕句

卷五

七言古詩

卷六

七言律詩

卷七

七言律詩

卷八

七言律詩

卷九

七言絕句

卷十

七言絕句

臣等謹按午溪集十卷元陳鑑撰鑑字伯銖
麗水人嘗官松陽教授後築室午溪上榜曰

萊猗遂以午溪名其集卷首題前進士曲阜
孔暘編選前進士青田劉基校正前有黃潛
張翥孫炎及暘基二人序翥序稱其學於外
舅周衡炎序又稱其學於翥故其詩雖才地
稍弱而吐言清脫不失風調蓋淵源有所自
來前又載基暘手柬各一通基東稱其體製
皆佳而近日應酬之作去其一二則純美暘
東則稱其篇篇合律而中呂字字鏗金而鏘

玉今觀其集誠不無稍傷冗蔓尚少簡汰則
基言為能中其病且基序稱午溪集一卷炎
序稱二卷賜序則稱四百餘篇今此本十卷
與賜所稱頗相合是基所欲去者賜仍為存
之宜持擇之未能悉歸精粹也乾隆四十
一年十一月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

午溪集原序

午溪集者枯蒼陳君伯銖之詩也伯銖生逢盛時而不
苟於祿仕徜徉里閭時出游江湖間平生所學兼著於
詩裒其所得凡若干篇俾予序卷首予聞為詩者必發
乎情人同此心心同此理則其情亦無以大相遠言詩
而本於人情故聞之者莫不有所契焉至於格力之高
下語意之工拙特以其受材之不齊非可強而致也後
世乃以詩為顯門之學慕雅淡則宗韋柳矜富麗則法

溫李掇拾摹擬以求其形似不為不近而去人情已遠矣伯銖之詩一出於自然未嘗以凌高厲空驚世駭俗為務指事托物而意趣深遠固能使人覽之而不厭者由其發乎情而不架虛強作也古詩之發乎情者是為變風若衛之淇奧是已昔者子貢舉是詩切磋琢磨之語而夫子許其可與言詩伯銖亦取是詩首句扁其所居堂曰綠猗殆有子貢氏之學乎其志未易量也姑以今之所見者序之如此云至正二年春二月庚申翰林直

學士中順大夫知制誥同修國史兼經筵官黃潛序

詩三百篇外漢魏六朝唐宋諸作毋慮千餘家殆不可一一論五七言古今律樂府歌行意雖人殊而各有至處非用心精詣未知其所得也余蚤歲學詩悉取古今人觀之若有脫然於中者由是知性情之天聲音之天發乎文字間有不容率易模寫然亦師承作者以博乎見聞游歷四方以熟乎世故必使事物情景融液混圓乃為窺詩家室堂蓋有變若極而無窮神若離而相貫

意到語盡而有遺音則夫抑揚起伏緩急濃淡力於刻畫點綴而一種風度自然雖使古人復生亦止乎是而已矣麗水陳伯銖父受學外舅此山周君衡有午溪集一編余嘗讀此山詩喜其深遠簡勁有詩家高處既又讀午溪詩大篇短章何其聲之似君衡也伯銖年正強才正裕苟不絕於吟而會通所作焉古不難到也伯銖余交厚故論及此且書於午溪集後庶乎覽者謂所言何如也至正三年季春上除日應奉翰林文字登仕郎

同知制誥兼國史院編修官張翥書

元統癸酉秋監察御史辟河東張仲舉為金陵郡博士
教弟子時永嘉李孝光天台丁仲容僧笑隱咸在炎以
弟子員得從之游登石頭城坐翠微亭故趾大江西來
如白虹遶城下淮南諸山盡在几席是日諸先生效韓
孟聯句仲容耆飲口訥訥不能語孝光顛漆黑仲舉長
面而鶴身善談謔酒酣日已沒宿龍翔方丈仲容困酒
先引去笑隱出燭中坐孝光在左仲舉在右昆侖奴作

通書郵仲舉首倡曰先皇昔潛邸梵宮冠東南遺弓泣
父老次授笑隱云云比曉仲舉奪筆走數韻成章余嘗
論仲容詩若大宛天馬舉足萬里有蓋世之氣仲舉如
鳴球琴瑟合軒轅氏律呂孝光若禹九鼎神奸物怪愴
人心鬼笑隱如崇溪之金隨手鑄器不離模範而神采
熠熠可畏嗟夫俯仰之間忽焉隔世獨仲舉先生尚存
在燕二十餘年乃今得見伯銖於枯伯銖與余實同出
張先生之門未相識也及相識而白髮種種亦如諸先

生游石頭城時惜余幼不力學長無所樹立而空老矣
猶幸及見伯銖伯銖有午溪集二卷詩多類張先生云
伯銖姓陳氏麗水人退菴孫炎序

古今詩人莫盛於唐唐之詩莫加於杜少陵自少陵而
後學詩者未有不以少陵為師然能造其藩籬者蓋鮮
況升堂入室乎蓋少陵號集大成不惟其古律詩皆備
而體製雄渾窮妙極玄實兼前人之所長故其語有奇
偉壯麗者有沖淡蕭散者有高古者有飄逸者至論其

入神處則皆在於沈著痛快焉學之者不辨其體制而
混然一槩師之譬之欲涉江河罔知津渡之攸在雖公
江河而步彷徨竟日終不得而濟矣夫伯夷柳下惠未
得與吾夫子並而得與吾夫子俱以聖稱者以其一偏
之行亦至乎極故也學詩者苟得少陵之一體而精焉
則可以言小成矣括蒼陳君伯銖好學善為文尤刻意
於詩翱翔湖海與名公勝士游聞見益廣賦詠亦工有
午溪集四百餘篇故黃文獻公與今仲舉張公伯溫劉

公皆為之序將鋟梓以傳聞余至枯復馳書以集示余
俾為之遴選且評其當否余黃公之門生嘗謁張公於
燕謁劉公於杭三君子之議論固所敬聽而誠服者夫
既皆贊君之詩矣余復何敢言雖然伯銖有命不容自
已乃取其集端誦之者累日但見夫良金美玉無可揀
擇而興趣之高詞意之雅則皆悠然有一唱三歎之音
余始愛其五言以為古詩學陶彭澤律詩學孟襄陽七
言則因是而擴之爾及吟諷之久然後知其一出於杜

少陵蓋非泛學杜集而專師其一體所謂沖澹蕭散者是已若其寫懷序事往往慷慨可念又非得杜公沈著痛快之旨者乎學詩如是可以自成一家矣大凡詩之本在乎達性情善作者不以雕琢為巧脂粉為華也往時聞劉須溪先生之語曰詩無論拙惡忌矜持又曰晉人語言使壹用為詩皆當掩出今古無他真故也今伯銖所賦無矜持之態又皆一出於真此誠真知詩道者故能髣髴古人自成一家則可以傳世矣夫豈一朝一

夕之力所至哉余非諛伯銖也知詩者虛心以諷之則
有以得之矣伯銖所居在午溪上故因以名其集云前
進士溫州路同知平陽州事曲阜孔暘序

世之為詩者將以為名與詩三百篇作者之名間見一
二其餘莫得而知也自漢以來文章始著名氏而行行
重行行飲馬長城窟等篇猶不知其作者古之人情有
所感則發為言將以明道非為身私是以切於事而造
於理人得而傳誦之如食膾炙知其味之美而不必問

其所從來也故所作不多而自傳非作者之期於傳也
魏晉以降實始夸多而競靡然數百年間其大顯者不
過數人其次所作雖多而其可傳者有限或八九篇或
二三篇或存其名而所作無傳焉不切於事不造於理
無所感於情而強為言故言雖多而不中譬如蜩蝻之
鳴雖不入耳而不可謂之不能鳴者若是雖名傳於人
亡益也麗水陳君伯銖有午溪集一卷觀其所著詩三
百有餘篇則皆典雅有思致發乎情而不愆乎義可傳

於世而不必其多者也余故喜而為之序焉至正丙申
十有二月望日從仕郎前江浙等處儒學提舉劉基序

欽定四庫全書

原序

欽定四庫全書

午溪集卷一

元 陳鎰 撰

五言古詩

古詩二首

深谷有幽蘭獨抱林下姿濯濯見貞性不受蒿艾欺淒涼風露晨花葉兩歲蕤孤潔羞自獻深晦乃若遺豈無采芳者悠然寄所思

嶧陽有孤桐豈願材中琴歲月修以邁坐閱霜雪深一
朝偶製用中存太古音臨風試新奏妙協鸞鳳吟但為
以心聽何事鑄黃金

呈黃晉卿學士二首

龍媒出渥洼萬里捲沙礫未習和鸞鳴早困鹽車厄槽
櫪少芻豆奴隸競鞭策偶然逢一顧驪牝有高識

鯢魚在北溟蝦蛭混其側一朝化為鵬獨去六月息鷁
鷁與斥鷃小知非所測於焉得培風垂天起雲翼

題徐氏貧樂亭

人人慕富貴富貴多危機不如貧樂者自得道所資卓
哉南州士澹然岩壑姿潔身事高蹈心與千載蟾峰
飛白雲蟾溪渙清漪世慮日以淡道味日以滋壺觴自
酬獻文字相娛嬉放懷山水間此樂知者誰

題湯景山畊樂亭

我耨日以畢我苗日以稠顧望浮雲陰巾車且經丘青
山在原野白水滿甌窰浮生已粗足外物吾何求更欣

桑麻成歲晚完衣裘作勞聊自慰山中酒新篘

次韻題周可翁清脩亭

達人屏外慕處靜得自安築亭蒼翠林心境清且寬涼
風四面起戛戛鳴琅玕此時坐其下快瀹雙月團我亦
愛竹者寄興同蕭閑素文曰已非托爾盟歲寒

過子陵灘

潮來沙浦深潦積流波悍舟行釣臺下老石在天半江
山領吳越樹木記炎漢當時羅英雄高見獨殊散所幸

無緇磷千載同一旦區區往來者幾閱洪濤亂清風不
可攀搔首復三嘆

武陵餞別劉元朗府推

河水日下流客子倦行役東西南北間飄蕩無終極君
候我邦來萬里問鄉國放舟桐江瀨繫馬庠林驛詎意
天一陬邂逅得良覲江山几席間把酒連日夕春光倏
云晚梨花已飄白況此羈旅中別離轉悽惻窮通雖異
途出處宜努力相思有好音願寄南飛翼

呈張仲舉博士二首

長松生澗壑千丈高崔巍蒼然歲寒姿不受霜雪催深
根踞厚地直幹排風雷明庭要結構大用須宏才願言
庇震凌下慰寒士懷

良馬出宛城羸垂在平陸蹠跡驚駘群彌年困羈束園
養無深知芻粟不滿腹逸志忘騰驤櫪下成久伏一經
伯樂顧終然致天育

次韻題冷泉亭

我游靈隱山木落素秋景廓然得遐觀萬象分馳逞古
石啣水痕寒山盪雲影投果拈白猿捫蘿陟蒼嶺回憇
泉上亭戴淪山中茗濁根已疏雪至味方雋永不知塵
世中有此清涼境緬懷白使君千載名不冷摩挲石上
詩歲月發深省

次韻季山父山長月夜見懷二首

衡門臨清漪盥沐便畸人况無勢利牽得與漁樵鄰脩
竹閤戶牖幽苔謝車輪故人不我過忽復徂冬春風塵

未寧肅世德潛鳳麟所憂吾道衰益見白髮新升堂俱
拜母壽酒得相因菽水可以養且用奉晨昏

浮雲翳涼月大風哆南箕人生良鮮歡汲汲亦何為緬
懷金石友素志當自持邈然阻良晤懼此世故危移家
寄雲壑采薇以充飢辟地誠未深可復畏奔馳艱難庶
相顧念子如連枝何由對牀夜盡和山中詩

次韻題莊雲卿竹垕詩卷

種竹已成林森列蒼玉扶疎古崖陰清風滿山谷若

人心境空藉此伴幽獨老氣不可干廩廩生意足載歌
淇奥詩遠勝十年讀何時造其所相傍秋雲宿

餞別李仲正府推二首

枯山峻而高枯水清且漪睠此山水郡民俗易保釐府
君來司刑明清如伯尼坐使獄訟空青草滿園扉棠陰
亦蔽芾載歌南國詩

沉沉白露涼叢叢青桂發時物一以變况復懷遠別鴻
翼起高逝萬里霄漢闊鸞鳩在榆枋鍛羽何由刷悠悠

碧雲思佇立溪上月

次韻程渠南過訪

長松有高人曠視天壤隘讀書闌闌中一室樂清快軒
軒野鶴姿迥出雲霄外孤妍出衆醜大雅息羣籟偶來
午溪濱一笑展良會終宵坐談文往往發竒怪芳畦蔬
可擷清池魚可鱸相看任真率白酒傾沆瀣結交幸忘
年俛首東野拜何時尋舊盟風雨連牀話

次韻道元上人晚步

上人悟覺空久已遺世慮清吟啓玄機妙語發新悟孤
鴻忘遠翔疲馬懷蹇步偶濯澗底泉暫憩雲邊樹山空
錫長隨溪遠杯可渡曠懷諒自如撫景樂真趣矯望東
西岩白雲自來去

春日偕楊震卿山長城東散步

今晨薄霧散遠嶠晴光開駕言城東游杖屨相追陪花
事在桃李日氣浮蒿萊適與景物會熙熙在春臺大哉
天地德萬彙出雕裁玄功不自有妙化付一杯而我與

數子雅好無相猜及時此行樂且復寄尊壘

次韻程渠南歲晚見寄

枯蒼有佳士磊落去崖岸高吟如涌泉
滌盡綺語硯讀書北山下矻矻窮歲晏
平生無媚容豈復事膏面散策松逕風
歌枕竹窓霰慚我江湖間避迹同燕雁
居然成落拓涉世寄憂患何當共尊酒
晤語一蕭散

贈楊貫道文學

昔爾先君子卓犖有清識芳懷薄蘭茝
高誼重金石賦

命何蹇屯乃為屢空迫一官在庠序老大亦無益今春
我西來相見叙疇昔共游西湖濱竟日隨杖策曉雲楚
山青夜月吳水白重來今始秋乃有死生隔子幸繼高
風深慰我淒惻云胡談論間亦復嘆窮塞懷哉騏驥姿
萬里汗方赤終當踏康衢未必困銜勒願子加自脩文
業嗣前德

寄松雪上人

憶昔游招提適喜塵事屏高堂坐清晝日映松雪炯上

人一單外淵默守諸靜了然塵幻空獨以詩自警童子
為燒香汲泉煮春茗留客聽疎鐘聲聞發深省歸來忽
三年寤寐鵲山境何時復相從踏月度修嶺

題劉平妻殺虎圖

役車在中野月落沙河濱此行亦良苦四望天無隣荒
林風慘慄猛虎出咬人倉忙不相保殺氣橫妖氛偉哉
結髮婦為義亡其身提刀直刺虎虎死不敢嗔有此孱
弱軀一勇冠三軍精誠照白日英風振蒼旻緬懷古馮

媛當熊義則均永激壯士膽殆非兒女聞

夏日幽居効建除體呈友人

建溪粒粟芽中山千日醇除憂與破睡二物可策勲滿
堂風月佳足慰閑散人平湖深且綠況乃清無塵定盟
得高友共守寂寞濱執禮雖雅道拘拘誠苦辛破帽與
短衣且用完吾身危機陷富貴不如安賤貧成虧亦何
有抱朴皆天真收歛貴深密用舍隨詘伸開簾對青山
朝夕烟光新閑息觀其生堦篁綠初勻

題松陽項氏瑞芝詩卷

和氣致祥瑞在草惟靈芝造化之所鍾人力詎可為松
陽有隱者結廬馬湖湄德潤日已廣枯朽生神奇三秀
同英華五色耀陸離睹茲生意深見者但嗟咨惟昔商
顏翁采之以療飢宜爾孫與子食德無休期松山翠綿
邈松水清逶迤流芳暨千載永言著聲詩

自題綠猗亭

森森蒼玉林寒光眩晴色蕭然塵表姿雅有君子德虛

陰閤夏涼一枕寄閒寂睡覺聞秋聲清風度窓碧

世間兒女花紅紫銜顏色我獨愛此君種之如種德築
亭蒼翠中嘯歌慰幽寂豈待搖落餘始識千雲碧

謾謾含風清娟娟淨秋色懷哉七賢趣遺此千載德窓
虛月未來林靜夜還寂危梢拂溪雲倒影澄波碧

清風動竹聲明月映竹色風月本無心於竹乃同德外
直凜貞勁中洞含虛寂作詩為寫神濃墨洒寒碧

次韻程渠南

歲月已云暮霜降林壑清吟軒忽我過樂此讌讌并春
客接晤語豁達傾真情汲泉煮山茗凍縷引孤竈

次韻卽本初題東岩

茲岩何穹窿屹立亘終古崖厂削劍痕石髓滴山雨天
開一罅峽風響答人語行登最高處逸興眇天柱

出郭

端居久無聊出郭頓清目烟光動墟里日影散林陸活
水明淺沙疎花傍脩竹地勝如桃源何必隱山谷

南泉嶺

朝登南泉嶺午過南泉坂始辭山木陰已覺川原晚
籃輿頗輕安風袂自蕭散行道雖逶遲遇物足延翫脩篁
淨娟娟寒水清練練因之懷故園秋花露初泣

病起

今日天無風肺氣稍平和起行庭戶外好鳥鳴脩柯園
花忽爛漫林笋出已多物情各向榮余亦散沈疴雖當
兵戈際幸此居山阿有子識生理解種桑與禾但知田

園樂祿仕夫如何

乙未秋九月十五偕季山長登東岩分韻得妙

字

盤盤上青空落落展遐眺秋高羣木變丹碧眩晴照東
西兩岩起雲谷通窳窳天風忽來喁可以發余嘯人生
塵世中千憂逢一笑寧將勝士槩下混俗子調夜投元
公房菊泉試茶鉞相從扣圓覺庶以達微妙

客中移居

為客棲未安地卑苦炎溽移此江上居山光醒心目回
環青竹林涼颼動相續寓情一尊酒放歌慰幽獨

秋夜感懷

夜涼疎雨過草木含幽滋素魄晦未明陰蟲韻何悲獨
驚節序改遽覺鬢髮衰離愁滿中抱念此當自知

過洪崖峽

山長足力蹇計行無常程礪礪石齒亂十步九折縈崖
泉變為雨白日成晦冥孤猿嘯雲裂幽鳥呼風生出峽

漸夷曠清溪忽然橫

雅山分韻得開字

雅山昔已到暇日還重來從游總閒逸杖策聊徘徊攜
尊翫松竹褰衣坐莓苔心舒野夷曠目縱山崔巍適此
象外趣滌我區中埃晤言若有得冲襟豁然開

午溪集卷一

欽定四庫全書

午溪集卷二

元 陳鎰 撰

五言古詩

聚星堂與諸文士宴集分韻得涼字

良會不易得
清秋宴高堂
佳哉數君子
玄髮俱已蒼
心親無遐邇
邇謂我如同鄉
共結文字緣
憂樂無相忘
世道一如此
風塵日飛揚
放懷聊自遣
終焉多感傷
冥冥鴻

鴈來幽幽蘭桂芳物情固有適吾徒幸小康相勸盡尊
酒庶用慰淒涼

九日次韻周學錄

重陽今朝是觸目皆兵戈青山豈不好何由陟嵯峨菊
花泣清露楓葉飄寒波觀物增盛懷奈此時未和流年
易超忽百世如鳥過於馬屏煩慮酌酒還高歌因觀作
吏人動輒遭譏訶奔馳風塵際憂患日已多吾徒守儒
素其樂當如何

再遊雅山分韻得秋字

人生宇宙內起滅同浮漚云胡事形役局局懷抱憂今
我及數子蕭散真寡儔已無外物繫偶往成勝游佳哉
雅山境翠竹森琳球復此展清宴興逸聊賡酬林深鳥
雀聚原曠禾黍稠時序良易邁不樂將焉求回途更延
覽天風盪衣裘薄暮微雨過輕寒釀深秋

游延慶寺

久厭城市喧偶出覽佳勝迢迢轉溪灣翳翳入山逕林

深寒日薄塔聳秋雲淨翠光冷松杉古韻度鐘磬躋石
遂幽討掬泉足清興忽聞禪老偈頗發騷人詠塵空性
自澄妄去心始定因悲射利徒擾擾一何競

次韻冷冷軒

彼美玉山泉涓涓出深谷匯作井洞幽其下龍蟠伏餘
流散無聲清寒入山木曲折數里遙故遠詩人屋簷間
寒月映簷外秋雲宿分貯歸瓶甕不用接脩竹清聲惟
在耳久聽天機熟寄語冷冷軒吾當挂冠服

奉和經略使李公景儀古詩一首并呈叅政石

末公

枯蒼實小郡居民守寒慳食鮮乃釣水茹美聊採山邇
來遭喪亂奔走不暫閑蕭條桑柘邨門巷生榛菅仰瞻
使星臨宛若天開顏仁風播清穆英氣摧雄姦勤勞奉
王事輒迹周塵寰恩波總沾沛下逮嫠與鰥大叅石末
公理亂歷險艱精誠懸赤日烈烈照兩間斯文賴宗主
慰我衰老瘵願言布陽春共挽生意還

呈孫都事

朔寒苦積陰烈風無時休况茲在萬山居然抱窮愁
首瞻王明偏照東南州陽春一以布皇華載咨諏感彼
草木秀使我瘡痍願安黎庶心六轡少淹留

薄采津池芹終朝不盈手邇來卧空谷蓬室甘老朽
餘生偶然全當此喪亂後幸逢治化新民弊賴繩糾我公
負經濟乃出羣賢首彙征徵自茲海內歸渾厚

送易安道往金陵

易侯來枯蒼朔雪尚留凍春陽一以敷生物欣稍衆辟
書復寵招急起走鞭鞚江山麗金陵閣視天宇空我慙
遯林陬道遠阻迎送寄情聊賦詩語拙不可誦期君在
丹青佇聽清風頌文運時方興及茲為大用

次韻葉文範訓導雜詠八首

留此巖避暑

何年留此岩洞壑深藏幽懸崖石棧細佛屋居上頭聞
君日登覽頗遂平生遊想當入空翠決潏香氣浮林深

遠溽暑池淨涵清秋逢僧作茗供庶可終日留人生濁
世中萬物同一漚今我衰且蹇亦復事林丘臨風誦君
詩勢利兩俱休

西澗暑夕懷友

青山一何高流水一何長念君守澗阿何因共相羊及
茲暑雨霽遙夜生微涼居然抱幽獨四顧皆崇岡而我
當此夕忽復病起牀徐行大溪上月在天中央衆星自
隱見耿耿亦有光豈不增感懷沈吟寄來章

山中晚步

詩人在山中時夏忘熱惱壯心久已降想若風旌倒待
月升山椒延風來木杪齋居近邛野桑竹自環遶更覺
農事饒連畦秀禾稻川坂窈而深頗勝桃源好緩策經
壑丘恬目送雲鳥安得遠相從逍遙共論道雖云途路
難無使音書杳人生諒有分且復散冲抱

再遊留此巖

韻士得幽趣名山還再尋逍遙清涼界披豁煩熱襟粲

粲古桂花娟娟青竹林
慧日散佳彩慈雲結輕陰
超然外形迹靜焉觀我心
境空無礙物地勝多布金
業緣尚覺淺味道殊喜深
薄暮想忘歸坐聆清聲音

賀西澗主人祈雨有應

夏旱雨有數聚巫還可求
今年忽大旱疲民實煎憂
澗西隱君子精誠達冥幽
沛然得甘靈白水滿田疇
持杯會鄰里共賀百穀秋
館賓枯中彥亦覺喜氣浮
詩成遠相寄念我儒家流
我昔為冷官一飯不易謀
只今願年

豐買田歸偃休

遊東巖

高岩暑雨霽晨光
眩初陽客子適登覽
捫蘿陟層岡絕壁倚孤峭
老樹鬱青蒼巍然頂僧廬
金像明滿堂鮮飈度危閣
寶幢動鳴璫仰視天宇寬
勝境何清涼傍有梁氏祠
其人久已亡曾經禦強寇
率兵此潛藏事往名則留
興懷多慨慷至今人避亂
固守全一方我家岩之陬
依棲幸安康約子當再游
飛佩高頡頏

西澗吟

有客在澗西
掬泉弄秋月
委心任自然
稍稍忘蘊結
空山更何有
白雲靜堪悅
時還搯孤琴
清音隨意發
却復念故廬
州城暮天闊
落葉飛不停
歲月去飄忽
世道猶崎嶇
歸計那可決
浩歌一長歎
涼颼激踈樾

午溪新堰

開堰午溪上
百畝可灌之
長輸不盡流
盖有源頭為
興言百世計
生理始於茲
雖然藉地利
亦用人力施
禾菽

既沾澤稍稍慰農私園田久荒者一旦皆見治經營非
我能廢興乃其時感君相問勞為作新堰詩

題憲使單公寧山詩卷

茲山幾千仞岩谷藏崎嶇屹然大自在岡巒鬱層林長
風息怒號微雲散輕陰勢摩蒼穹高氣壓后土深皇皇
繡衣使日夕頻登臨千里寄一瞬浩蕩開雄襟愛此成
雅號處靜悅我心岩岩衆所瞻令名垂古今

次韻春日友人過訪

門前不盡溪種柳高十尋時雨忽然過蕩漾春水深好
鳥鳴間關動我懷友心正謀尊酒盈感子亦遠臨持杯
起相酬清談豁冲襟世故尚艱難思古復慨今子乃久
羈旅孤情寄高吟戀戀未成別華月生東林

次韻葉訓導同飲且懷道元上人

人生出處異所歷多悲歡倦翮戀故林縱鱗思狂瀾焉
知我輩人守靜心自寬相逢秋正中皓月如銀盤有此
尊酒盈可浣憂恨端君言方外友一往骨已寒御觴忽

不樂清賞情易闌余亦重懷感臨風寄長嘆

次韻吳仲懷學錄理髮有感

君子遯林壑德潤日以滋清晨啓重門理髮延輕颺比
櫛去其垢心慙乃自知盈顛忽種種靚茲却興悲感懷
寄吟詠秀句何瓌奇默傷時序邁蹭蹬無所施風塵况
擾擾涉歷世故危雖云髮早白年實未及衰惟昔踐場
屋曾折丹桂枝功名姑少試其志在遠期而我苦節士
亦復懷明時為子歌欲放歌罷還自嗤

郡中次友人韻

茂宰遠見招偶此到公府留連日復日及茲已徂暑子
乃自遠回衣濕冒風雨如何父母邦栖栖若行旅賴有
同心朋尊酒忘賓主謂言喪亂餘一飯皆天與我亦念
前冬登山聽輦鼓然火中夜行子實同此苦虎口幸脫
生佚老還可許且當浩浩歌無為踏甕舞

呈麗水吳明府

明廷重守令茂宰出選掄公家世簪紱接踵皆良循麗

邑雖曠僻風俗稍朴淳自公下車來息彼凋瘵民秉公
守廉節敷政從寬仁睹此垂老年獲覩化瑟新熙熙百
里內物象俱含春行看政治飛舄登要津

九日次韻葉訓導

二年喪亂餘隱居聊種菊佳節倏已臨稍覺天氣肅杜
門澹無營不與世馳逐涼風連高原殘陽挂疎木於焉
寄登覽悠然豁心目為樂當及時歲月去還速吾里窈
而深子亦來卜築幸此隔清溪扁舟時往復所欣道義

交固無榮與辱相逢輒命觴開軒遠山綠

避亂西澗和蔡伯玉餞別韻

携家逃亂世登君川上樓自非宿昔心曷肯為我謀開
軒納遠山展席臨清流時游古仙岩頗憶阮與劉世路
尚風塵此地殊深幽居然欣有托不覺成遲留眷眷終
不怠此意誰能酬片言寫莫既感戴如山丘茲焉動歸
興孟夏麥已秋握手未忍別碧雲生晚愁

次韻梁天與

憶子遠相過，開酌梅花前。微風自溪來，素月當空懸。結
歡良未久，執別感哀年。况乃遭世亂，辟地常懷賢。寂寞
居澗西，孤坐寒無羶。起看石崖瀑，飛沫跳珠圓。子亦在
他方，碧雲隔長天。睽彼歲年晚，哀鴻聲續連。何當復相
從，剪燭夜不眠。於時發清琴，幽懷諒可宣。

次韻葉訓導蕪簡徐定甫

束書出城闌，來住溪上宅。五年喪亂中，奔走身如客。今
春復遠游，相望遠東北。冷况雖蕭條，文會多舊識。我亦

曾相從湖海念疇昔仄聞風月佳無由分半席書樓敞
高明遠對羣峯碧主人頗閒暇登陟時整屐君今喜賦
歸溪深鮮可食世道尚艱危幸此居山澤臨風接清談
逍遙寄茲夕

次韻吳學錄過訪二首

故人過我宿青燈夜何其殷勤接軟語尊俎聊設施山
寒耿孤月溪淨生微颼索居負幽意跼蹐諒何為況於
干戈際沉鬱多幽思子獨心神舒六學一貫之相從歲

年晚慨彼時事非

我衰如倦翮幽栖忘遠翔平生性耿介固於圓鑿方白
雲自怡悅欲寄難持將子尚苦讀書一覽應五行蒼山
可杖策午溪可舟航曷不時相從攄懷寄詞章別後情
如何煙水愁莽蒼

次韻荅蔡伯玉

春風蕩林梢晴光散虛亭好鳥鳴間關慰我幽居情景
物日以佳豈不懷友朋顧茲咫尺間如何寡逢迎怡情

一尊酒安得君同傾况乃衰病餘坦然息心兵種彼溪
上竹碧陰滿窓櫺老去尚勤讀夜坐宜短檠承君寄佳
章一覽塵思清何當來滄洲共結沙鷗盟

次韻荅友人

我懷幽遠人佳境心所宅超然外形骸聽視寡聲色宴
坐哦清詩秀句出林碧涼颼來廣庭微月耿虛夕茲時
尊酒盈妙趣良有得而我蕭散姿亦抱山水癖不為世
故牽寓物隨所適逍遙味道腴虛室自生白

欽定四庫全書



午溪集

午溪集卷二

欽定四庫全書

午溪集卷三

元 陳鎰 撰

五言律詩

溪上晚步

散步斜陽外獨行無與期
魚梁秋水落沙樹夕雲散
人事有閒日溪流無盡時
悠然心景會盤礴得歸遲

送孔魯茂錄事解官歸永嘉

到老心常赤先憂髮易蒼紀綱吾道重風節古人方山
驛黃花雨江村烏桕霜孤帆又東去離恨滿滄浪

送西岩僧道元住靈泉寺

細字看三藏明心閱大千受衣岩下寺卓錫澗南泉一
峽清風遠雙峯白月圓燈燈傳祖印自有雪堂禪

登善庵訪張貞居外史不遇

窈窕湖山外延緣土徑斜青林多佛屋白壁半人家鶴
出雲無侶梅寒雪未華令人惜清興回首望烟霞

次韻周子符過訪二首

十里山川隔相過，豈偶然浮雲懷往事。
逝水嘆流年，徑窈存松菊。池平散芡蓮，開軒風日靜。
共詠白雲篇，地僻景幽甚。居安道自然，飲泉甘勝乳。
種樹老忘年，生意自家草。清香君子蓮，一尊延素月。
不愧北山篇。

宜晚樓

樓小偏宜晚涼颼，在曲櫺月生沙觜。
白烟着樹頭青一壑，藏靈籟。羣山入畫屏，憑高無盡興。
醉目豁然醒。

早程

野日荒荒上岩花的的明水渾羣鹿過林靜獨禽鳴夜
雨催農事春風厚客情肩輿堪坐凭詩興等閑生

訪隱者

偶然來訪隱山崦有幽居日下看蒸藥風前伴閱書竹
光青滿鵝水色綠循除應笑塵中客終年幾覆車

江村

景物佳如此游觀意自如白雲生島嶼紅日下村墟水

聞漁歌遠天長鴈影疎偶同江叟語端欲此移居

晚泊

日落江村靜風恬潮水平
羈懷苦寥落歲事況崢嶸
峴陽梅花白沙寒雪片明
一杯蓬下酒不放客愁繁

錢唐送友人之維揚

瀟灑一尊酒江樓得共傾
相逢俱是客離別易傷情
樹色迷春綠雲光拂曉晴
還思挂帆處淮海正潮生

次韻晚步

閉門春欲盡偶出愜幽尋桑葉人家晚桃花澗底深看
雲閑倚石聽瀑懶攜琴蕭瑟青林下嵐霏滿一襟

客舊館

曾作蕪城客重來又五秋魚鹽河上市簫鼓竹西樓地
暖梅花發天寒江水流依然風月好且復寄優游

次韻訪靈泉上人二首

携詩訪禪老地僻景途幽紅葉千林晚黃花一徑秋
雲低屋角澗水落磯頭漸掃江湖迹相從話舊游

山徑來雲氣烟林變晚容偶然成獨出且喜得相逢此
興知誰會常時悔自慵長吟破寥闌涼月上高松

次韻村居

寂寞三家市龍鍾七十翁相逢說生理自說得農功
雖來年熟蠶登桑柘空時平人意樂邀我一尊同

再游西峯寺

西峯清淨地塢下有僧居曾見寶花座多留貝葉書
禪師能伏虎長者解觀魚來此求無相塵心頓豁如

客至

客至衡茅下晴暎破曉新徑花紅半墮門柳綠初勻市
遠盤無饌村深釀頗醇呼兒具蔬筍聊爾見情真

林亭小酌

林亭多晚趣尊酒寓清歡山近雲侵座溪虛月滿闌張
琴深竹潤拂石古苔寒自足成吾隱逍遙寄鶻冠

次韻游城東屠蘓

尋僧朝偶出還似厭塵勞水澗泉聲細霜林樹影高倦

行聊解屨小坐暫旋袍且喜逢支遁酬詩染兔毫

旅懷

風雪歲將晚客行猶未休山前沽濁酒江上發孤舟
杳飛雲遠棲棲去雁愁歸歟是何日生理在林丘

次韻月明德經歷游茅山冷泉澗

聲確山中徑徐行暫卸鞍蘚青粘屐冷松翠滴衣單
石竇留雲濕岩泉瀉月寒語來天已夕歸步向盤跚

次韻道元上人歲晚二首

山蹤迷落葉天氣正深冬崖雨添寒瀑溪雲向晚蒼客
凭臨水閣僧叩隔林鐘倚杖無餘事招猿下碧松

地偏人跡罕境寂自無譁雲濕松窓硯風清竹屋茶石
梁融雪液山沼落泉花腸近寒梅發相看鬚易華

病起述懷二首

居閑無世慮塊獨守吾廬病起方除藥行來暫閱書秋
花慰岑寂老髮任蕭疎何事馳驅者無心賦遂初

溪邊成小隱竹裏結茅廬養鶴憂無料盟鷗喜有書山

深寒到早門靜客來疎風俗饒淳樸游心太古初

次韻荅楊文學

江湖成久客歸思忽然生富貴非吾願交游亦世情頭
顱今已老生計尚無營一舸滄洲外梅花興自清

武陵送友人之維揚

西淝同為客維揚子獨游持杯酌別酒挂席促行舟夜
月千燈市春風十里樓瓊花正堪賞到日却遲留

丙戌元旦客中

開門春滿室旅况尚淒涼
椒柏迎新歲萍蓬在異鄉
歷頭忘檢閱賀客少迎將
獨有高堂念今晨阻奉觴

重游南明山佛日寺

重到南山寺清涼一壑風
慧光明佛日梵語隱天宮
岩洞留雲在池泉與海通
三平人去後石虎勢穹窿

次韻葉子西

萬山秋欲盡邂逅古城巾
霜徑寒花晚風林落葉空
笑談情自厚酬和白難工
明日還分手看君馬首東

次韻春夕旅懷

此身同倦翮暫托一枝安
山近春常雨溪深夜更寒
燈花頻剪落香篆暗燒殘
明日尋歸路松陰滿石闌

次韻郊居

細水黃泥路空山白板門
一身安畎畝萬事信乾坤
架上新酒渾小兒能采藥
粗可給晨昏

餞別楊貫道山長歸錢唐

楊生別我去故國在天涯
野店投鞭早江船繫纜遲
行

裝無長物吟卷有新詩
留取懷中橘還家慰母思

己丑九月抵金華旅館和舊題詩韻

冉冉歲華換悠悠道路長
老來兼病肺秋末尚殊方
池水荷衣盡林霜橘子黃
故園何日返已負菊花觴

旅愁

莽莽深春雨江花落漸多
客舟偏阻滯兵甲屢經過
深逝魚驚鰲高飛鳥避羅
傷懷逢世亂吾道竟如何

次韻同友人宿山家

偶然逢故友攜手玉山西
澗水穿林響岨雲壓樹低東
風棟花老落日子規啼共宿
松窓夜篝燈和舊題

贈常悅道

老年豪氣在衰髮已盈簪
時掃先親墓難忘孝子心奚
囊兼貯易行李只攜琴莫問
窮通事相逢酒滿斟

親墓在吾

里

題悅道預挽詩卷

達人窮至理視死即如歸
且願此身在何憂生事微卜

瑩垂後計學道覺前非羨爾超然者令人早息機

松陽學舍讀張修撰詩因用韻述懷二首

冷官無一事詩思日來添幽鳥閒窺沼游絲靜挂簷煮
茶然小鼎看竹捲疎簾無怪居連市盤食味可兼

門深無俗軌春晚綠陰添竹色侵衣袂松花拂帽簷清
風自開戶明月忽當簾況有佳山水真成吏隱兼

次韻友人移居二首

知爾因離亂移家住白雲已逃狼虎患且友鹿麋羣消

日惟憑酒傷時懶著文從今成小隱榮辱兩無聞
強飲心先醉狂歌興易闌登樓憶王粲閉戶學袁安
柏葉歲新改梅花春尚寒何時定相訪剪燭話艱難

午溪集卷三

欽定四庫全書

午溪集卷四

元 陳鎰 撰

五言律詩

冬夜書懷

三載廣文館蕭然類野僧
病懷猶索寞詩句自崢嶸
樓迥初更鼓窓寒獨夜燈
擁裘坐無寐漸見月華澄

獨坐

蟾峰常在眼獨坐更當軒
哀晚名猶薄棲遲道自存
瓦寒簷雀聚帙古壁魚繁
嘆此風塵際幽懷孰與論

挽葉學錄

故人不可見一夢遽登仙
宅廢兵戈際池荒草樹邊
諸生懷絳帳孤子守青氈
寂寞蟾峰下傷情夜雨懸

挽徐學賓

相逢離亂後吾道竟悠哉
愧乏陳蕃禮憐多徐孺才
看山頻曳杖對月幾嘶杯
今日平舒路懷君倍覺哀

過楊山長廢宅

廢宅經離亂心傷往事非
堂中人已去梁上燕空歸
徑草烟痕積門槐雨葉稀
無言對斜日惆悵一沾衣

遊白塢寺園

山空秋日晚信步到名園
古井通潮脉隣廡過竹根
雲移塔影動河隔市聲喧
已覺催歸興投林鳥疾奔

丁酉八月十二夜武陵對月是日省除青田主

簿

明月相將滿照人歸興長清光疑不夜孤影在他鄉賸
把芳醪酌從無錦瑟張桂花偏有意茲夕送天香

次韻陳府掾山寺述懷

久憇招提境秋風醉叵羅山空雲起石林冷葉辭柯世
事塵機息詩懷野興多絕憐同作客牢落竟如何

再次韻荅周學錄

此地風塵息聊堪避網羅潛鱗依舊穴倦翮戀深柯遲
暮相知少艱時感慨多酒醒過半夜奈此客愁何

次韻蕭別駕秋懷四首并呈章參謀

徑年縻薄宦秋晚興悠哉
掃逕深門掩聯鑣上客來
清談延晝永衰髮覺年催
嘆惜遭離亂愁腸日九迴

空齋宿雨霽涼氣入衣裘
簾捲青山曉池涵碧樹秋
自經人世亂轉覺此身浮
矯首乾坤闊傷懷王粲樓

端居聊自適遠色望中明
載誦悲秋句難忘憂國情
溪風薦微冷山月吐寒更
兀坐渾無寐愁聞警柝鳴

木葉蕭蕭下哀蛩石上鳴
髣髴毛衰易白胸次鬱難平
聽

雨添鄉思看雲識世情
沉吟多感慨搔首立前榮

再次韻

未嫌官舍冷秋色頗佳哉
有客論文坐無人載酒來
疎陰涼葉墮急景候蟲催
吟罷閑延佇長廊日影回

藪藪夕風起輕寒生薄裘
數峰林外晚獨樹水邊秋
世事萍無定此身雲共浮
據林一長嘯還憶庾公樓

晚景頗好道寸心孤月明
山川游宦況松菊故園情
遼渺天難問艱危事屢更
倚闌生遠思雲外暮鴻鳴

涼氣漸淒肅吟風黃葉鳴閑庭多雨積秋草與階平久
為傷時亂都忘玩物情儒官粗堪守勇爵是浮榮

三用韻答松學諸友

此地三年客登臨亦快哉幸無官長罵喜有故人来把
酒捲簾坐吟詩擊鉢催蟾峰青楚楚時見鶴飛回
牢落風塵際天寒一弊裘看來官獨冷贏得鷗添秋樹
潤烟光合池深水氣浮鄉心日夜切戍鼓起城樓

水色循階碧山光入牖明客稀無俗事地僻有幽情但

得親朋厚何慚主僕更隨時聊自遣憂樂以詩鳴
萬木漸搖落涼風策策鳴客愁驚老大世亂念昇平雖
忝官曹列難忘丘壑情故園頻入夢松菊想敷榮

挽項學齋

相聚今三載交情只似初艱難逢亂世辛苦卜幽居得
米時沽酒分燈夜看書老成零落盡吾道復何如

早過湖南

湖月娟娟在衣寒怯早行水邊孤鶴起郊外亂鷄鳴

落身將老艱危世未平何當謝塵鞅歸傍白雲耕

次韻簡周濟川山長二首

故人辭薄宦去隱白雲鄉溪樹春天晚山泉夜月涼携
家憐杜甫齊物憶蒙莊知爾身和世於今亦兩忘
白首頻遭亂其如造物何縱鱗乘駭浪病鶴托脩柯別
友歲年久懷人夢寐多扁舟須過我沽酒聽漁歌

寄友人

憐君來此隱竟日掩岩扉山晚碧雲合溪深黃葉飛干

戈雖暫息鄉國未能歸想見行吟處寒波澹落暉

挽道元上人二首

久翫林泉月今乘古峽風身遺萬劫永道悟一塵空寒

竹留枯節幽花落舊叢惟餘行誦處山意遠無窮

寺樓
扁山

意

元公今歿去令我獨懷思經罷惟談道禪餘不廢詩雲

巢孤鶴守石洞斷猿悲寂寞燒香室窓寒白月遲

元公
號雲

巢

和吳伯京學正立春見寄韻

我已多衰病君今亦老成
閉門驚臘盡把酒及春生
但願兵戈息從無爵祿榮
郡齋風月好吟咏足幽情

拜故參政石末公祠堂

一代名臣錄公應作首
推功勲家有集忠義主深知
海右戍今已人間病不治
瓣香千古意遺廟草離離

奉題按察使詩卷

使臣持玉節南國動春容
古驛梨花白荒城柳葉濃
居

官無酷吏在野有畊農明日回驄馬蒼山雲萬重

贈周山長

并序

濟川周君於余為斯文骨肉今冬乃子善長
膺省召躬送其行過余言別謾成律詩一章
以寫歲暮之懷并為善長贈行云

歲暮猶行役風霜襲緼袍幸無嫌酒薄聊爾助詩豪世
事皆前定人生謾自勞功名如可取端合付兒曹

和吳學正見寄韻二首

一從相別後寄跡各東西歲月身惟老風塵眼欲迷依
山松徑窈臨水草堂低獨坐相思夜淒涼月滿溪
不見故人久悠然多所思郡齋呼茗椀山館理桐絲望
斷雲凝處吟殘葉落時風霜歲年晚還共竹猗猗

五言絕句

題買從道枯木石圖

寂歷何年樹槎牙傍水村霜風吹葉盡秋色落雲根

次韻

老去頭添雪愁來眼著花清尊不成釀閑坐到昏鴉

懷張應奉

故人千里外相見一何難幾度裁書尺秋雲鴈影寒

野步

隨意踏春沙綠塍度菜花偶逢溪叟語行到野人家

次韻過湖南竹林

一徑入深寂森然萬琅玕日暮雪欲落翠袖生薄寒

題草堂晚景圖

遠水涵碧波重山歛暝色琴客期未來草堂新月白

題方泳道縣尹竹石圖

瀟灑數尺篁孱顏一拳石開卷清風生凜然見寒碧

客中九日

客居鄰小市有酒有黃花莫訝無詩友故鄉天一涯
今晨風落帽秋髩覺蒼蒼小酌聊成醉都忘在異鄉

偶題

小亭環綠筠瀟灑宜宴坐是中賓主誰明月清風我

晚興

野興遂幽討獨行河水湄平原忽空曠蟬聲在高枝

渡江

殘月曉猶在微茫水氣涼潮來風滿棹送客過錢塘

病起夜坐二首

獨坐寒窻夜深爐火欲灰無窮身外事都逐雨聲來
自憐衰老貌燈影雪千莖藥餌扶吾病詩書寄此生

明旦再用前韻

杜門聊守拙
利祿念俱灰
舊雨曾來客
如今雨不來
古鼎燒香篆
朝盤薦菜莖
澹然閑自適
何用學吾生

春日漫興二首

人閑境亦幽
鳥鳴山更靜
臨流玩落花
清興與川永
開園近屋頭
日陟自成趣
心懷千載期
鋤雲種松樹

午溪集卷四

欽定四庫全書

午溪集卷五

元 陳鎰 撰

七言古詩

謝楊震卿山長惠李息齋枯木竹石圖

我家枯蒼西山西重岡複嶺藏迴溪
蔦蘿篁竹最深密
半生此地成幽棲
爾來汨汨隨寒暑
走遍東吳與南楚
長嫌客舍似雞栖
夢寐山林有遺墅
李侯標格清逼人

胸中丘壑絕無塵戲將醉筆一揮灑怪石古木連蒼筠
先生好事緹藏久不意今朝落吾手却如置我故山間
謾謾清風起林藪客中愁絕夜不眠萬里秋思隨人先
便須攜此歸桂草堂時時開酌賞以瑤華篇

謁張伯雨外史

先生昔住句曲山瓊樓絳闕相通寬飛幢游戲九霄上
下視赤日如跳丸却來平地尋舊隱摩挲古石看烟痕
孤雲蹤跡偶還往此身本在無還間天書雲篆真訣秘

蒼精含景秋芒寒老我江湖倦游客洗心只欲聽談玄
蓬萊弱水如可到願借來鶴隨游軒

開元宮有來鶴亭烟痕石

次韻周子符中秋賞月

去年為客錢唐館序屬中秋涼意滿杜門獨酌風雨來
簷溜瀟瀟聲不斷今年歸上午溪樓長天月白還中秋
洞簫吹徹夜寥閒玉盤正在闌干頭素光眩眩清無奈
興豪欲踏鯨鰲背此生此景須盡歡放浪形骸天地外
金尊潑灑生酒波團團桂樹青婆娑人生四美不易具

此酒不飲如公何

贈寫竹齊伯玉

少微躔下有佳客紫髯漆髮雙瞳碧前年騎鶴遊廣陵
傲睨江濤弄明月雄才聲聲天馬駒清標炯炯冰玉壺
滿襟英氣歛不住却與竹君傳畫圖酒酣肝膽露芒角
雪壁淋漓翻墨汁興豪一掃數百竿立玉排空森列戟
蒼烟漠漠橫高秋虛堂晝靜聞蕭颼知君用心亦良苦
落筆妙覩文洋州我漸飄泊大江北歲晚交情冷如鐵

欲留此畫共結三友盟只恐一夕通靈化梭辟

次韻同徐子蒼賞海棠

芳姿艷質天與妍玉環飛燕俱堪憐昭陽華清留不住
化去却作花中仙當時扶醉春容醒富貴風流兩杳然
雕欄玉檻安在哉依舊東風好光景今人尚愛宮中妝
一春對花醉百場踏歌槌鼓窮夜飲連天畫燭迷春芳
老我偏慙脚無力十年奔走他鄉國花時偶喜得還家
把酒看花空太息教兒莫放清樽空剪取步障圍春風

人生得時且歡樂少年轉眼成衰翁

次韻賦無言上人盆石

海窟移來一拳石膚寸中藏勢千尺天然幻出補陀宮
使我觀瞻晤空色瑞光隱隱生霧烟清氣霏霏充几席
夜來對坐默無言水月清涼梔子碧

次韻友人西湖訪梅

經年旅食紅塵市壓座笙歌喧醉耳山林清夢竟荒迷
眼底詩人能有幾朔風吹寒澍宿霧聞道西湖梅半吐

共君漂泊在天涯却嘆流年暗中度疎花冷蕊回陽春
清波淡月傳花神君命得句更奇絕對花如對冰玉人
老我見梅心愈醒曾向湖邊弄香影不愁雪後白糝糊
再約孤山訪和靖

寄張外史

鐵冠栽栽鶴氅裘冲襟炯炯冰壺秋進履曾下黃石拜
辟穀獨從赤松遊官府真仙上界足富貴於我如雲浮
乞取金丹換毛骨飛佩往謁崑崙丘

次韻客中答友人

我生牢落寡時偶半世江湖厭奔走霜風吹破黑貂裘
畫虎不成羞類狗羨君意氣隘八區自說功名分中有
往時曾學屠龍技向去當施縛麟手萍蓬偶爾屢相逢
黃金醉輦如澠酒去年共訪西湖梅今年又賦平山柳
侈然惠我雲錦章五采繽紛落晴牖自慚衰老百不如
深荷交情日親厚難將魚目報夜光但惜黃鐘調瓦缶
倚歌慷慨不自羈酒酣拔劍蛟龍吼

次韻夏日野步

縹絲人家雞午啼
南牆雨過篁竹齊
出門更喜新綠淨
旋布石磯行過溪
香醪滿榼供提攜
垂楊樹外聽鳴鸝
因嗟田父行水泥
有餉不充葵與藜

三月十三日同松陽諸友游東臯過逍遙宮分韻得草字

葛中野服偕詩老
步出東臯散懷抱
尋幽更到逍遙宮
坐我澄軒淨如掃
山寒石竇雲起遲
地迥松林鶴歸早

何時重約黃冠師直上靈巖拾瑤草

中秋感懷呈松學諸友

我昔扁舟泛淮水萬頃琉璃月光裏夜深復上城南樓
笛聲未斷簫聲起燕姬二八比玉花纖纖潋灩傾流霞
筵前舞袖影凌亂青年意氣百倍加歸來歲月如轉燭
圓缺陰晴幾悲樂只今白首歎無成晚得一官餘不足
江北江南多亂離吁嗟赤子無所依長松古邑亦遭毀
空餘野草秋螢飛乾坤浩蕩父老盡逝水東流徒濶濶

世間萬事何時終
豈若龐公鹿門隱
人生對酒當盡歡
此宵此月能幾看
杜陵詩老曾有語
無使霜露沾衣寒
次韻壽友人

銀潢秋水洗丰骨
談笑掀髯豪興發
婆律旃檀香味浮
琉璃琥珀酒光滑
雖無紅袖共歡娛
謾有清詩寫奇絕
祝君之壽老益堅
靜夜觀書眼如月

秋日葉訓導招飲分韻得摘字

主人登樓宴賓客
笑語相懽盡今夕
蟾溪清浸月光秋

兔阜寒通雲氣白舉頭但覺銀漢低澆胸未怪金杯窄
重陽更約醉西風牆根菊蕊應堪摘

再分韻得百字

南陽有客髯如戟更覺心腸堅鐵石攜來舊日書一囊
分坐中齋燈半席制齡且學餐菊英辟世休言種桃核
便當沽酒消窮愁袖中我有錢三百

溪樓小宴分韻得頭字

西風浩蕩吹衣裘天氣漸冷黃花秋山城酒熟方新菊

雖非九日堪追遊今朝偶出招朋儔
尊采菊登高樓雕盤烏几羅珍羞
一觴一詠相賡酬蟾光當窻青入眸
珠簾倒挂珊瑚鈎晚霞絢彩晴未收
白蘋掩映波光浮醉酣更覺忘百憂
胸中世故散不留詩成復作商聲謳
他人能有此樂不丈夫命達當封侯
未達自分歸林丘我聞弘景不出休
何須更畫金籠頭

題院判石末公見惠趙仲穆雙馬圖

使君惠我雙馬圖雄姿逸態世所無
流傳韓幹舊墨蹟

湖州公子親臨摹湖州自是名家駒繪畫此馬與衆殊
鬚鬣蕭蕭朔風起舉足萬里無長途彎弓馬上者誰子
馳裘烏帽貂襜褕游韁飛鞭柳陰外射殺黃熊及於菟
只今世亂多戰伐駕駘龍種同馳驅邊城人馬半已死
空令撫卷成嗟吁使君統領百萬夫要平南楚并東吳
英雄事業佐玄德願起此馬如的盧

次韻孫都事越中大雪歌

庚子之歲云暮矣越中大雪若幽薊凍雲十日撥不開

亂灑斜飛勢容喬山川高下爛瓊瑤世界三千色無二
倚壑高松折巨枝入地遺蝗藏醜類乾坤已回北作南
凝沍陰中有和氣白頭父老為咨嗟百年覩此真奇異
反聞城市三尺餘陋巷益深難擁簪漁翁披簑迷晚歸
童子映書忘夜寐我雖寒苦興自豪一上層樓豁胸次
豈無党進酒淺斟不學袁安戶深閉醉酣箕踞正長吟
忽有詩從鳳池至左司先生文武兼統制吾邦居重位
凜然清氣逼銀河散此六花飛大地兵塵沴疾盡洗空

窮谷深山亦漸被因知天意兆禎祥
明年大有公當記
好溪堰為吳明府作

縣公築堰東九里大堤橫截長溪水
引流下注萬頃田
禾稻翻風翠雲起去年陂堰未曾開
況值亢旱天為災
城中亂罷正蕭索兼無秋實人民哀
今年爭看決渠雨
龍骨長閑桂梁柵老農仰卧歌南風
但知歡樂無所苦
君侯事業如白公流芳千載無終窮
願公更展作霖手
均此德澤四海同

次韻葉中甫見寄

葉公與我皆奇士骨相峻嶒氣雄偉當年湖海屢相逢
酒酣擊劍秋風起結交落落青雲賓談笑相過無俗軌
潛心不復事詩書要取功名侯萬里誰知白髮成兩翁
此意蕭條今已矣忽然寄詩來問安歷說舊游情愈美
况遭世亂多變遷富貴榮華如覆水嗟余獨抱寒苦調
只有豪吟差可擬結廬幸喜近清溪贖種桃花紅蕊蕊
約君待向春水肥共駕扁舟釣魴鯉

次韻孀婦嘆

用杜工部詩韻

城東孀婦髮未華，半生苦樂隨夫家。
前年夫戍死鋒鏑，姑老子幼長吁嗟。
攜持幼子獨存立，倚簾羞見燕雙入。
辛勤紡績得米薪，晨昏奉姑粗供給。
鄰家女子瑳素頭，壓髻金釵髻相並。
下階自折櫻桃花，愛惜嬌容時照井。
誰知孀婦拭淚痕，為夫築墳松樹根。
此身抱節誓不改，甘守寂寞黃茅材。

次韻蔡伯玉見寄

吾邦風俗頗淳古田里居民皆樂土天教我輩以筆耕
播詠聲詩遍寰宇養生不用服金丹充腸自有首蓴盤
四時佳景足延覽清溪浩蕩山高寒我昔別君為冷掾
五載區區食破硯相望南北如風枝却喜歸來復相見
去年風塵暗不開招我西澗同銜杯巖頭啼鳥日催起
看雲聽瀑心悠哉只今世事已如此碌碌微官如敝屣
便從巢許隱終身掬取清流洗塵耳



午溪集卷五